

Kerjaya Prospek raih kontrak pembinaan RM201.25j

PETALING JAYA: Kerjaya Prospek Group Berhad (KPGB) menerusi anak syarikat milik penuhnya, Kerjaya Prospek (M) Sdn. Bhd. (KPM), memperoleh kontrak pembinaan bernilai RM201.25 juta bagi kerja-kerja bangunan di Damansara Damai, Selangor.

Dalam makluman kepada Bursa Malaysia, KPGB berkata, KPM telah menerima pakai lantikan daripada Greencove Sdn. Bhd., anak syarikat milik penuh Kerjaya Prospek Property Berhad (KPPB) pada 15 Januari 2026 untuk kontrak pembinaan tersebut.

Katanya, kontrak berasaskan jumlah tetap itu melibatkan pembinaan dua blok pangsapuri setinggi 39 tingkat yang merangkumi 780 unit kediaman, ruang rekreasi, lima aras tempat letak kereta podium, serta ruang komersial di aras bawah dan separa bawah.

“Kerja-kerja pembinaan dijadualkan bermula pada 1 April 2026 dan akan disiapkan dalam tempoh 40 bulan.

“Penerimaan kontrak ini adalah selaras dengan perjalanan biasa perniagaan KPM dan ia dijangka menyumbang aliran pendapatan tambahan kepada kumpulan dalam tempoh empat tahun akan datang,” katanya.

KPGB berkata, kontrak tersebut akan mengukuhkan buku pesanan sedia ada dan dijangka memberi sumbangan positif kepada pendapatan serta aset bersih sesaham kumpulan bagi tahun kewangan 2026 hingga 2029.

Pengerusi Bukan Bebas Bukan Eksekutif KPGB, Datuk Seri Tee Eng Ho merupakan pengarah kepada beberapa anak syarikat KPPB dan juga pemegang saham utama KPGB dan KPPB melalui kepentingan tersiratnya dalam KPGB dan KPPB melalui syarikat-syarikat yang mana beliau dan isterinya, Datin Seri Toh Siew Chuon serta adiknya, Datuk Tee Eng Seng mempunyai kepentingan langsung dan tersirat.